

靈邱縣補志第三卷之八

人物志

邑爲晉北邊鄙地當要衝故屢代興革不常遷徙靡定其間之忠義鄉賢雖間有一二舊本記載已畧今亦無從稽訪邇來聲教肆訖修養有年地雖彈丸人文蔚起其外忠於國內孝於親學問經濟勛業治行表表著名於世者尙不乏人用以採而志之以爲後起矜式

忠烈

苗如璋拔貢由膳錄議敘以教職用選授興縣教諭
卓異保升知縣歷任甘肅合水湖南甯鄉等縣知縣
署桂東縣事值賊衆播亂佔踞城池璋督勇力勦克
復桂陽酃縣崇義上猶並廣東興甯江西龍泉等縣
城池保賜藍翎加知府陞銜後以勦賊墜馬因傷身
死事聞優卹如例崇祀昭忠祠子淦世襲雲騎尉
王永清乾隆戊午科武舉署新平路瓦窑口千總性
忠勇每戰必爭先不避鋒刃值川陝軍需奉派出師
追勦賊匪戰歿於陣事聞優卹如例崇祀昭忠祠子

珍世襲雲騎尉

王珍永清子由世襲雲騎尉歷陞廣東肇慶協都司署連陽營遊擊值猺匪寇亂滑縣珍從師力戰七晝夜虜戮甚衆因被火藥轟傷而死事聞優卹如例崇祀昭忠祠子攀桂世襲雲騎尉

治行

武甯周姿性明敏康熙間以議敘出仕選授山東東昌府經歷受事年餘值東省饑饉委辦賑濟井井有條民賴以全活者衆遂以卓薦陞授廣東徐聞縣知

縣越年邑當大禋請賑賙恤諸事精詳民沾其惠不可勝計屢調署海康遂溪等縣知縣鋤奸除暴政績卓著後以老乞休民情感戴眷戀出境之日相送者越百里不絕

李晶性豁達有材智以拔貢就職直隸州州判分發陝西值地方教匪作亂辦理軍務勤能保陞知縣題補石泉縣知縣署甯陝廳同知時值叛兵滋事相機設伏得解城圍民賴以安尋陞孝義同知屢署邠州直隸州及鳳翔興安等府旋陞四川嘉定府知府循

聲卓著惠及士民後以眼疾引退卒於家

李金臺舉人任安徽婺源縣知縣歷署英山全椒等縣方正不阿愛民如子疾惡如讐操持嚴潔聽斷明決到處興利革弊除暴安良民甚德之後以疾卒於官

孝義

盧生瑞庠生性至孝母疾經年晝夜侍奉衣不解帶一日母思豚蹄生瑞入市市之及歸母已歿哀毀骨立痛不欲生遂以豚蹄殉葬而自不苟輦者百日

陳濮字威遠武舉性至孝因母誤中杏仁毒多方求治有醫者言非食糞清不可救母難之濮設法瀝淨先試嘗無他味然後跪白母始飲之遂愈

王作棧邑人髫齡失怙家業赤貧事母克盡孝養甘旨無缺母歿哀痛備至凡事必於柩前稟訴而行每念母孀居苦節輒痛哭終朝旣葬食必供奉出入仍於木主前稟告敬奉一如生儀

馬楷齡邑人自幼失怙奉母至孝菽水承歡經商在外隨時歸省必厚備甘旨依依膝下如嬰兒狀晚侍

母寢不至妻室以經商未得久事故也

李棠庠生性廉潔事繼母至孝生順志歿盡哀友愛諸弟備極周至教子以義方鄉里有急難無不解囊助之

劉嘉澍州同職銜性孝友事父母惟謹承奉無違與弟析產絲毫不較鄉里共稱其賢

劉愈潤州同職銜寬厚和平事繼母以孝待異母弟友愛備至家庭雍睦鄉里咸稱孝友

劉浩然監生豁達不拘好善樂施事繼母以孝稱敬

兄友弟教子義方後長子堦領鄉薦人以爲善施所致

劉宏典邑人有善必作見義勇爲康熙四十三年邑值大饑里民無力完納賦課宏典輸金代納歲豐亦不責償卽踵門以報者悉卻焉邑令范君義其事舉耆賓給匾旌其門曰一鄉之善至今子孫線延猶食舊德

李懷璽恩貢性剛直見豪強欺侮平民挺身護之時因賦役繁重民多苦之懷璽委曲呈懇查辦得實減

免私派之弊碑誌城南里人均沾其惠

劉遂裕介賓性長厚勤儉起家慷慨好施道光十三年邑大饑出粟賑濟活人甚多治家有道五世同堂後壽登耄期請

旌建五世同堂坊於邑之小西關

劉統邑民性仁厚而尤勇於義有堂孀少寡挈子他適統聞之力爭歸宗善爲撫養及長爲之受室並出資教以營業後族弟得由貨殖起家使堂叔宗嗣不絕皆統之力焉

李昇監生乃四川嘉定府李晶之堂兄也雖與晶分居各爨友愛不異同胞嘉慶年間川陝教匪滋事晶以拔貢就職州判投效軍營昇爲寬籌路費其時晶家貧親老昇更慨助其仰事俯育之資十餘年如一日復備匭主嫁晶之大次二女一如待親女晶之所以內顧無憂卒能一心王事樹績成名皆昇之力焉

文苑

丁勗字勉齋號東籬性嗜學善畫工書習舉子業而屢困名場乃復專攻理學舉所習六經百家沉潛反

覆著有東籬文集及丁氏家傳諸書卓卓可傳後以恩貢就教卒年八十餘歲猶手不釋卷

曹連增生性廉介取與不苟喜讀書詠誦無倦色不以家貧爲念晚年育於目授生徒皆以口傳授業於門下者悉多

列女

附

按史傳列女凡賢母淑媛皆載及非僅傳貞節也今則採訪無人不便妄加附會惟以節孝貞列錄之

王氏庠生劉誠一妻夫歿苦守白首完貞康熙五十五年

旌表建坊

張氏李鳳翔妻年十八而寡遺子呈瑞教之成立身入邑庠公舉孝廉方正守節三十二年乾隆十一年

旌表建坊

邊氏邑民曹昉妻夫歿守節白首完貞乾隆二十三年

旌表

劉氏邑民支九福妻堅貞守節矢志靡他乾隆四十五年

旌表

馬氏邑民韓應廣妻夫亡苦節終身乾隆四十七年

旌表

張氏邑民李旺妻夫亡苦守教子成立壽享百有三歲乾隆四十七年

旌表

李氏庠生白鳳繼妻年二十三夫歿苦守教子成立

歷三十九年乾隆五十二年

旌表

燕氏王在國妻年十九而夫亡遺子一氏撫孤守節
苦歷三十餘年乾隆五十五年

旌表建防

王氏邑民岳淳然妻夫歿無子矢志靡他守節三十
七年乾隆五十七年

旌表建坊

康氏邑民王興起妻夫亡無子守節三十七年乾隆

五十七年

旌賜其門曰幽蘭獨茂

王氏庠生張健妻年二十四而寡守節三十一年教子成立乾隆五十八年

旌表

孫氏張廣妻年十八夫故家貧子幼苦歷堅貞守節五十三年乾隆年間

旌表

劉氏庠生岳拱極妻夫亡守節以女紅度日苦節終

身乾隆年間

旌表

祁氏楊萬棟妻夫亡苦節終身乾隆年間

旌表

季氏監生李琯妻年十九夫亡遺子幼小矢志守節
苦歷四十餘年嘉慶元年

旌表

韓氏邑民盧家嶼妻年十八夫亡遺子一矢志撫育
守節三十三年嘉慶五年

旌表

岳氏邑民曹惠妻年十七夫亡遺子一撫之成立守節三十九年嘉慶八年

旌表

王氏武生張俊繼妻年二十一夫歿子幼家貧堅貞苦守歷三十餘年嘉慶八年

旌表

李氏劉恒繼妻年二十夫亡子幼善病舅姑在堂子不育復繼姪爲嗣守節三十八年嘉慶十年